

Aqua granda

(Giorgia Dalle Ore - StorieStorte)

*I gà cavà la corente, xè scuro d'apartuto
no ne xè più resta niente, solo un frastuono muto
blocai soto sequestro da 'na laguna amara
che amemo e odiemo, e a fasi alterne,
l'amor diventa smara*

**Aqua granda, aqua alta
No ghea vantemo più
Va' zo Venesia e par sugarla
ne bastaria tirarla su de un metro e mexo
e co' un bon prezzo te sugo anca i canali,
scavo barene, verzo autostrade e faso entrar i squali**

4 novembre del '66, ti te ricorderà
Ea butava via anca i murazi, me conta me papà
I fioi anca un fià ghe ne rideva de tuta 'sta situazion
"dai, monta in barca che te porto da Ss. Apostoli fin ala stazion"

L'acqua marsise i pali, i muri e magna fora le bone intenzion
Adeso el salso fa' davvero paura e sta volta par na bona razon
Invese de calar la continua a crescer e no la se ferma più
Sie ore ormai xè 'ndae da un toco e se continua cusì,
"viva Gesù!"

**Aqua granda, aqua alta
No ghea vantemo più
Va' zo Venesia e par sugarla
ne bastaria tirarla su de un metro e mexo
e co' un bon prezzo te sugo anca i canali,
scavo barene, verzo autostrade e faso entrar i squali**

La spuse ne ciapa la testa e te vardo co i pie a mogie
No savemo più se xè acqua de mar, de laguna o se la vien su da le fogne
Scoase, libri, tochi de mobili, galegia in giro par la cale

Na voxe in testa me dixè “Ma chi te lo fa far?!”
Tira su le strase e fa fora dale bale!”

No Signori, me dispiaze, mi da de qua no me movo.
Sugo par tera, cavo via el salso e ricomincio da novo
“Ma cosa vuoi fare, qui in mezzo al mare, meglio andare in terraferma!
Ci sono nuovi palazzi e più sicurezza, ti diamo noi la conferma”

I me parevi onesti e oneste dopotuto anca le so intension
No me saria mai spostada sensa na bona ragion
Go fato i bagagli e go lassa la strada verta ad affari e a nove economie.
Le me paure xè stada la chiave par nove ciavarie!

Aqua granda, aqua alta
No ghea vantemo più
Va' zo Venesia e par sugarla
ne bastaria tirarla su de un metro e mexo
e co' un bon prezzo te sugo anca i canali,
scavo barene, verzo autostrade e faso entrar i squali